

दिनांक 28.04.2024

समय: 18.50 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी कर्नाटक रे बेलगावी मांय चुनावी सभा ने कर्यो सम्बोधित-कह्यो, केन्द्र सरकार कानी सुं पारित भारतीय न्याय संहिता कानून सुं व्यवस्था रो चौखो प्रबंधन व्हेला ।
- प्रदेश मांय दूजे चरण वाळा 13 लोकसभा खेतरां मांय मतदान मांय ग्रामीण खेतरा री महिलावां शहरी महिलावां सुं री आगे- 18 सुं 19 वर्ष आयुवर्ग रा 60 फीसदी मतदाता वोट डाल्या ।
- मुख्यमंत्री भजनलाल शर्मा काले सुं पश्चिम बंगाल अर झारखंड रा दौरे माथे-केई जनसभावां अर सम्मेलनां मांय सिरकत करण रो कार्यक्रम ।

अर

- प्रदेश मांय घणखर ठौड़ां माथे गर्मी रो असर बरकरार-आगले दो-तीन दिनां मांय तापमान मांय 2 सुं 4 डिग्री सेल्सियस ताई गिरावट री आस ।

000

प्रधानमंत्री अर भारतीय जनता पार्टी रा वरिष्ठ नेता नरेन्द्र मोदी कह्यो की लारला दस बरसा मांय वाणी सरकार **किसान उत्पादक संगठन** रे माध्यम सुं छोटा काश्तकरां री लागत कम करणे अर कृषि उपज खातिर बाजार खोलणे मांय सहायता करी है । श्री मोदी कर्नाटक रा बेलगांवी मांय आज एक चुणाव सभा मांय कह्यो की वित्तीय सहायता सुं दस करोड़ सुं बत्ती **महिला स्वयं सहायता समूहां** ने फायदो व्हयो है । वणा कह्यो की काश्तकरां ने ईधन मांय **एथेनॉल मिश्रण** सुं 70 हजार करोड़ रुपया री आमदनी व्ही है । प्रधानमंत्री कह्यो की केन्द्र सरकार कानी सुं पारित **भारतीय न्याय संहिता कानून** सुं व्यवस्था रो चौखो इन्तजाम व्हेला ।

000

प्रदेश मांय दूजा चरण वाळा 13 लोकसभा खेतरा मांय ग्रामीण खेतर री महिलावां शहरी महिलावां सुं मतदान मांय आगे री। वठिने शहरां मांय पुरुष ग्रामीण इलाकां रे पुरुषां सुं बत्ती मतदान कर्यो। मुख्य निर्वाचन अधिकारी प्रवीण गुप्ता बतायो कि शहरां री 63 दशमलव 64 फीसदी महिलावां मतदान कर्यो जदकि ग्रामीण खेतर मांय 64 दशमलव 47 फीसदी महिलावां आप रे मताधिकार रो प्रयोग कर्यो है। इणी तरह शहरी खेतर रा पुरुष मतदातावां 67 दशमलव 67 फीसदी जद की ग्रामीण खेतर रा पुरुष 65 दशमलव 22 फीसदी वोट डाल्यां। वठिने शहरां मांय 56 दशमलव 33 फीसदी थर्ड जेंडर मतदाता, जदकि ग्रामीण खेतर मांय 40 फीसदी थर्ड जेंडर मतदाता वोट डाल्यो। श्री गुप्ता ने बतायो कि ग्रामीण इलाकां रा कुल 64 दशमलव 86 फीसदी मतदाता मतदान कर्यो जद की शहरी खेतर रा कुल 65 दशमलव 69 फीसदी मतदाता मताधिकार रो प्रयोग कर्यो। जालौर—सिरोही सीट माथे सब सुं बत्ती 73 दशमलव 55 फीसदी शहरी मतदाता मतदान कर्यो। वठिने बाड़मेर लोकसभा खेतर मांय सब सुं बत्ती 76 दशमलव 58 फीसदी ग्रामीण मतदाता मतदान कर्यो। वठिने पहले चरण मांय शहरी खेतर मांय सब सुं बत्ती 65 दशमलव 57 फीसदी मतदान गंगानगर अर सबसुं कम 52 दशमलव 18 फीसदी मतदान भरतपुर मांय व्ह्यो। निर्वाचन महकमे रे मुजब प्रदेश रा सगळा 25 लोकसभा खेतर मांय 60 दशमलव 72 फीसदी महिलावां वोट डाल्या है। इण मांय चूरू, झुंझनूं, सीकर, पाली, जालोर, उदयपुर, बांसवाड़ा अर राजसमंद मांय महिलावां पुरुषां रे मुकाबले बत्ती मतदान कर्यो है। वठिने नुवां मतदातावां रे मतदान रे आंकडे माथे निजर डाला तो इण आयु वर्ग रा करीब 60 फीसदी मतदाता इण बार मताधिकार रो प्रयोग कर्यो है। प्रदेश मांय 18 सुं 19 आयु वर्ग रा कुल पंजीकृत 16 लाख 64 हजार 845 नुवां मतदातावां मांय सुं कुल 9 लाख 91 हजार 505 ही मतदान कर्यो।

000

प्रदेश मांय लोकसभा आम चुनाव रे मद्देनजर न्यारी—न्यारी **प्रर्वतन एजेंसियां** मार्च री सरुआत सुं अबे तांई नशीली दवावां, शराब, कीमती धातुआं, मुफ्त बांटी जावण वाळी वस्तुवां अर अवैध नकद रकम रे रूप मांय **932** करोड़ रूपयां मूल्य सुं बत्ती री जब्ती करी है।

आदर्श आचार संहिता लागू होवण रे पाछे निर्वाचन महकमां रे निर्देश माथे 16 मार्च सुं अबै ताई ऐ एजेंसियां **834** करोड़ रुपया सुं बत्ती री सामग्री जब्त करी है। मुख्य निर्वाचन अधिकारी प्रवीण गुप्ता बतायो कि प्रदेश मांय चुणाव ने प्रभावित करणे रे लगस सुं संदिग्ध वस्तुवां अर अवैध धन रे उपयोग माथे अलग-अलग एजेंसियां कड़ी निगराणी राख री है। इणी कड़ी मांय प्रदेश भर मांय लगातार जब्ती री कार्रवाई करी जा री है। एक मार्च सुं अबे ताई राजस्थान मांय चार जिला मांय **40-40** करोड़ रुपयां सुं बत्ती, 9 जिलां मांय **30-30** करोड़ रुपयां अर 13 जिलां मांय **20-20** करोड़ रुपयां सुं बत्ती लागत री संदिग्ध वस्तुवां अर नकदी जब्त करीजी है।

000

मुख्यमंत्री भजनलाल शर्मा काले सुं पश्चिम बंगाल अर झारखंड रे दौरे माथे रहवेला। इण रे चालता श्री शर्मा लोकसभा चुनाव खातिर पार्टी प्रत्याशियां री नामांकन सभा मांय भाग लेवेला अर प्रबुद्धजन सम्मेलनां मांय मारवाड़ियां सुं बणतल करेला। मुख्यमंत्री सोमवार री सुंवारे कोलकाता खातिर रवाना व्हेला, जठे वे पार्टी प्रत्याशी रे समर्थन मांय रोड़ शो करेला। इण पाछे वे न्यारा-न्यारा वर्गों रे लोगां सुं मुलाकात करेला। आगले दिन वे कोलकता सुं झारखंड खातिर रवाना व्हेला जठे वे **दुलू महतो** रे समर्थन मांय जनसभा ने सम्बोधित करेला। इण रे पाछे व धनबाद मांय प्रबुद्धजन सम्मेलन अर प्रवासी सम्मेलन मांय भी भाग लेवेला।

0000

राज्यपाल कलराज मिश्र काले बीकानेर दौरे माथे रेवेला। श्री मिश्र तकनीकी विश्वविद्यालय रा **दूसरा दीक्षांत जळसा** मांय मुख्य अतिथि रे तौर माथे शिरकत करेला। राज्यपाल रे दौरे ने ले र जिला प्रशासन सगळी तियारियां पूरी कर ली है। कार्यक्रम रे मुजब राज्यपाल काले सुंवारे सवा ग्यारह बज्यां नाल एयरपोर्ट पहुचेलां अर अठे सुं वे सर्किट हाउस जावेला।

0000

नारकोटिक्स कंट्रोल ब्यूरो –एनसीबी अर गुजरात एटीएस री संयुक्त टीम राजस्थान–गुजरात मांय 300 करोड़ रूपयां री प्रतिबंधित ड्रग एमडी पकड़ी। टीम कुल 13 जणां ने गिरफ्तार कर्यो है। प्रदेश मांय व्ही कार्रवाई मांय स्थानीय पुलिस भी संयुक्त ऑपरेशन मांय भागीदारी निभाई। अर और ब्यूरो म्हाणा खबरनवीस सुं –

0000

प्रधानमंत्री सूर्यघर मुफ्त बिजली योजना रे तैत जैसलमेर जिला मांय कुल 36 हजार बिजली उपभोक्तावां सोलर प्लांट लगाणे खातिर ऑनलाइन रजिस्ट्रेशन करवायो है। डिस्कॉम रे अलावा ऊर्जा मंत्रालय सुं अनुबंध रे तैत डाकघर ने भी जिला मांय 25 हजार 140 रजिस्ट्रेशन करवाणे रो लगस मिल्यो है। वहीं डिस्कॉम ने 11 हजार रजिस्ट्रेशन करवाणे रो लगस मिल्यो है। अबै ताई डिस्कॉम रा पोर्टल माथे 2 हजार 57 अर डाकघर रा पोर्टल माथे 92 लोगां रजिस्ट्रेशन करवायो है।

000

प्रदेश मांय घणखर ठौड़ां माथे गर्मी रो असर बरकरार है। प्रदेश री खासी ठौड़ां माथे लारले चौबीस घंटां मांय बत्ती ऊं बत्ती तापमान 36 डिग्री सेल्सियस सुं 40 डिग्री सेल्सियस रे बीचे दरज करीज्यो। सब सुं बत्ती 40 दशमलव 1 डिग्री सेल्सियस तापमान अलवर मांय दर्ज करी ज्यो। वठीने आज प्रदेश रा उत्तर–पश्चिमी खेतर रे ऊपर बणयोडा एक परिसंचरण तंत्र रे कारणे बीकानेर, श्रीगंगानगर, हनुमानगढ़ अर आसे–पासे रे खेतरा मांय बादळ छायोड़ा है। जैसलमेर मांय आज बादळा री आवाजावी सुं तापमान मांय गिरावट होणे सुं लोगां ने गर्मी सुं राहत मिली है। मौसम महकमे रे मुजब इण तंत्र रे कारणे आं खेतरां मांय बादळ गरजणे रे साथै कठे–कठे हल्की बिरखा या बूदाबांदी व्हे सके है। प्रदेश रे बाकी भागां मांय भी आवता 4–5 दिनां ताई मौसम सुखो बण्योड़ो रहवेला। काले अर परसुं बीकानेर अर जोधपुर संभाग रा कई ठौड़ां मांय तेज हवावां चालणे अर तापमान मांय 2 सुं 4 डिग्री सेल्सियस होवण री आस है।

0000

राज्य सरकार गर्मी ने देखतां थकां मनरेगा कामां रे बकत मांय बदलाव कर्यो है। अबै मनरेगा कामां रो बकत एक मई सुं 15 जुलाई ताई सुवारे 6 बज्यां सुं दुपहरां एक

बज्यां ताईं रेवेला। इण अवधि रे पाछे काम रो बकत जिला कलेक्टर आप रे स्तर माथे तय कर सकेला।

000

अलवर रा सरिस्का वन्य जीव अभयारण्य खेतर रा नया भूरासिद्ध मांय आज सफाई अभियान चलायो गयो। अभियान मांय वन महकमो अर बफर जोन रा अहलकार, कर्मचारी अर आमजन सफाई कर र स्वच्छता रो संदेश दियो। इण रे चालता करीब 60 सुं बत्ती बोरा प्लास्टिक अर पॉलिथीन भेळा कर जंगल सुं बारे लार खतम कर्या। आम जणा रे सहयोग सुं चलायां सफाई अभियान सुं पर्यावरण संरक्षण व्हेला, वठीने वन्य जीवां ने भी फायदो मिलेला।

000

जयपुर मांय आगला म्हीना सुं तीन दिनां रो द ग्रेट इंडियन ट्रैवल बाजार रो आयोजन व्हेला। पर्यटक मेहकमां री निदेशक डॉ. रश्मि शर्मा बतायो कि 5 सुं 7 मई ताईं चालण वाळां इण आयोजन ने ले र तियारियां शुरू व्हे चुकी है।

000